

**Datum: 29.05.2017.**  
**Broj:02-04 (3410)**

**Ministarstvo civilnih poslova  
Trg BiH 1  
71000 Sarajeva**

**PREDMET: Prigovor na imenovanje Arifa Nanića za direktora Agencije za identifikaciona dokumenta, evidenciju i razmjenu podataka**

Poštovani,

Savjet ministara je na svojoj 102. sjednici usvojio izvještaj Ministarstva civilnih poslova o sprovedenom postupku za izbor direktora Agencije za identifikaciona dokumenta, evidenciju i razmjenu podataka (IDDEEA) i imenovao **Arifa Nanića** kao najboljeg kandidata nakon sprovedene procedure javnog konkursa u skladu sa Zakonom o ministarskim imenovanjima, imenovanjima Savjeta ministara i drugim imenovanjima Bosne i Hercegovine.

Arif Nanić je istovremeno član Kancelarije za razmatranje žalbi (Kancelarija) čije članove u skladu sa članom 93. stavom 10. Zakona o javnim nabavkama imenuje Parlamentarna skupština BiH koja donosi odluku o pokretanju i provođenju procedure izbora i imenovanja *ad hoc* povjerenstva za izbor i imenovanje članova Kancelarije. Član 93. stav 13. Zakona o javnim nabavkama predviđa da je funkcija članova Kancelarije za razmatranje žalbi nespojiva s bilo kojom drugom direktnom ili indirektnom, stalnom ili povremenom dužnošću, s izuzetkom akademskih, naučnih ili publicističkih aktivnost.

Transparency International u BiH (TI BiH) je svojim zahtjevom za pristup informacijama od 08.05.2017.g. tražio informaciju od Kancelarije da li je Arif Nanić podnio ostavku na mjesto člana uzimajući u obzir gore navedenu odredbu o nespojivim dužnostima i činjenicu da je u to vrijeme navedeno lice već obavljalo dužnost vršioca dužnosti direktora IDDEEA-e.

Kancelarija je u svom odgovoru broj: UP1-01-12-1-9-2/17 od 19.05.2017., zaprimljen kod TI BiH 24.05.2017.g., navela kako Arif Nanić do dana izdavanja odnosnog rješenja nije podnio ostavku na mjesto člana Kancelarije u filijali Banjaluka.

**Dokaz:** Kopija Rješenja Kancelarije za razmatranje žalbi broj: UP1-01-12-1-9-2/17 od 19.05.2017

Uzimajući u obzir navedeno, a sa pozivom na član 16. stav 1. Zakona o ministarskim imenovanjima, imenovanjima Savjeta ministara i drugim imenovanjima Bosne i Hercegovine, TI BiH ističe prigovor na imenovanje Arifa Nanića za direktora IDDEEA-e jer principi iz člana 3. odnosnog Zakona kojim se uređuje imenovanje nisu ispoštovani. Naime, član 3. propisuje da konačno imenovanje se ne može izvršiti ukoliko nisu ispoštovani principi utvrđeni ovim članom, a među te principe se, između ostalog, ubrajaju sljedeći principi:

**(A) Zakonitosti:** Odgovorni javni službenik osigurava da se sva javna imenovanja vrše na zakonit način i u skladu sa **svim važećim pravilima, propisima i zakonima.**

**(B) Kvalitet:** Glavni princip kojim se rukovode sva imenovanja je princip izbora na osnovu kvaliteta, putem dobro informisanog izbora lica koja po svojim sposobnostima, iskustvu i kvalitetima odgovaraju potrebi reguliranog organa koji je u pitanju.

(C) **Nezavisne provjere:** Sva imenovanja vrše se na način koji omogućava da ih provjerava nezavisna treća strana (uključujući organe i organizacije) koja nije učestvovala u procesu imenovanja.

(D) **Otvorenosti i transparentnosti:** Principi javnosti upravljanja primjenjuju se na proces imenovanja. Funkcionisanje procesa mora biti transparentno i, osim ako informacija nije povjerljiva prema odredbama člana 15. ovog zakona, kada je predviđeno ovim zakonom, pojedinosti o imenovanjima u reguliranim organima moraju se obznaniti.

U konkretnom slučaju nisu ispoštovani principi zakonitosti i kvaliteta jer imenovano lice Arif Nanić imenovan je na nezakonit način kako njegovo imenovanje nije u skladu sa svim važećim propisima jer princip zakonitosti podrazumijeva upravo to, odnosno imenovanje mora biti u skladu sa svim važećim pravilima, propisima i zakonima, a ne samo sa u skladu sa zakonom kojim se izbliza regulišu imeovanja Savjeta ministara. U pogledu ovog imenovanja sporno je to što Zakon o javnim nabavkama eksplicitno predviđa članom 93. stavom 13. da funkcija člana Kancelarije za razmatranje žalbi nije spojiva s bilo kojom drugom direktnom ili indirektnom, stalnom ili povremenom dužnošću, s izuzetkom akademskih, naučnih ili publicističkih aktivnosti. Na ovaj način se podriva i princip kvaliteta jer se stavlja sumnja na izbor na osnovu kvaliteta kako je suprotno propisima imenovano lice koje već obavlja funkciju koja je nespojiva sa bilo kojom drugom dužnošću, a to uključuje i onu dužnost koja nastaje imenovanjem za direktora jedne upravne organizacije.

Sa pozivom na članove 16. i 17. Zakona o ministarskim imenovanjima, imenovanjima Savjeta ministara i drugim imenovanjima Bosne i Hercegovine, TI BiH ističe prigovor na predmetno imenovanje Arifa Nanića, te predlaže da se ovo imenovanje poništi i da se pristupi novom postupku imenovanja.

Prilog:

1. Kopija Rješenja Kancelarije za razmatranje žalbi broj: UP1-01-12-1-9-2/17 od 19.05.2017

S poštovanjem,



Lejla Ibranović  
Izvršna direktorica  
Transparency International BiH